

## **Bbaruha Gyakubanza Ginyakuhandiikwa Yohaana Kwanjuura**

Bbaruha gigi gyegebeerwe nka *Bbaruha gya Yohaana gyakubanza*, gyahandiikiirwe mukwenda Yohaana. Yaagihandiikiiri beikiriza ba Kurisito bensei. Yaagihandiikiiri na bi-gyendeerwa bibiri: Kyakubanza yendeerye kusoboresya bantu banyakwikiririzanga mu Yesu, kwicala nibali mu bumwei na Ruhanga, na Mwana waamwe Yesu Kurisito. Kandi gyahandiikiirwe habwa kuhabura babwo beikiriza ba Yesu kwerinda kuhondera beegesa ba bugobya. Beegesa babwo beegesyengi nibakobanti, Yesu atakabbe muntu mu bwizulu, kandi atakabbe Ruhanga mu bwizulu.

Nahabwakikyo, mu ngeru gya kulwanisya gigyozegesya gya bugobya, muhandiki wa bbaruha gigi yaahandiikiiri niyolokya nti, Yesu Kurisito yaabyalirwe na mubiri nka bantu bensei kubabba. Kindi yaakobiri nti, babwo bensei beikiririza mu Yesu Kurisito balina kuhondera biragiro bya Ruhanga, na kubba na ngonzi na beira baabu.

**Bicweka Bihandu bya mu kiki Kitabbu nka Kubihonderegeni**

(i) Ndagiiro 1:1-4

(ii) Kyererezi na Ntiti 1:5—2:29

(iii) Baana ba Ruhanga na ba Sitaani 3:1-24

(iv) Mananu na Bugobya 4:1-6

(v) Bujunaanizibwa huli mu kubba na Ngonzi  
4:7-21

(vi) Kusingura kuli mu Kwikiriza 5:1-21

### *Kigambu kya Bwomi*

<sup>1</sup> Tukubahandiikira kubaweera bintu bikukwatagana na yogwo Kigambu kya bwomi munyakubbaho kuruga kadei, mu kubanza na kubanza. Yooyo yogwo gitwegwiri naakutuweera bigambu byamwe, yooyo yogwo gitwaweeniho na meiso geetu, kandi de twamukwataho na ngalu zeetu. <sup>2</sup> Yogwo agaba bwomi, buyeiziri mu nsi, twamuweeni; bi byo bitwaweeni byobyo bitukuheera bukeiso. Tukubaweera nti, yooyo bwomi butamalikaho munyakubba na Bbaa weetu Ruhanga, kandi yooyo munyakwiza muli twe. <sup>3</sup> Yogwo gitwaweeni kandi twegwa bigambu byamwe, yooyo gitukubaweeraho, aleke mubbe na bumweji natwe, habwakubba tuli mu bumweji na yogwo Bbaa weetu hamweji na Mwana waamwe Yesu Kurisito. <sup>4</sup> Nahabwakikyo tubahandiikiiri bibi bigambu aleke nanywe musobore kusemererwa hoji hamweji natwe.

### *Ruhanga abba Kyererezi*

<sup>5</sup> Bi byo bigambu bitukubaweera byobyo bitwegwiri Kurisito naatuweera nti, Ruhanga abba kyererezi, kandi muli yo tihabbamwo ntiti kadi na kadooli. <sup>6</sup> Twabba nitukukoba nti tuli mu bumweji na Ruhanga, beitu kandi nitukulibatira mu ntiti, bubwu tuli mu kugobya; tuli kwahi mu

kukora mananu. <sup>7</sup> Beitu twakabba nitukwicala mu kyererezi, nka Ruhanga kweicala kyererezi, hūbwo tukubba nituli mu hūmwei nanywe, kandi neibbanga Iya Yesu, Mwana waamwe, likubba litunaabyaho bibii byetu byensei.

<sup>8</sup> Twakabba nitukukoba nti, tituli na kibii, tuli mu kwegobyagobya, na mananu ga Ruhanga gakubba gatali muli twe. <sup>9</sup> Beitu kakubba twatula bibii byetu hali Ruhanga, abba mwe-sigwa kandi mwinganiza kutuganyira bibii byetu na kutunaabyaho hutadoori hwensei. <sup>10</sup> Kandi twakabba nitukukoba titukakoranga kibii, tukubba nitukufoora Ruhanga kubba mugobya, na kigambu kyamwe kikubba kitali muli twe.

## 2

<sup>1</sup> Nywe baana bange, nkubahandiikira bibi bigambu aleke mutalikora kibii. Beitu haakabba nihaloho muntu yensei akoori kibii, twicala na yogwo atutonganiira hali Bbaa weetu, yooyo Yesu Kurisito mwinganiza. <sup>2</sup> Yooyo kyonzira kya bibii byetu, hatali bibii byetu bisa, beitu na bibii bya bantu bensei.

<sup>3</sup> Twakabba nitukuhondera biragiro byamwe, hūbwo tukubba nitukwolokya nti tumwegiri. <sup>4</sup> Yogwo yensei yeetwala kubba amwegiri beitu atakuhondera biragiro byamwe abba mugobya, na mananu ga kigambu kyamwe gabba gatali muli yo. <sup>5</sup> Beitu yogwo yensei ahondera biragiro byamwe, yogwo yooyo ali na ngonzi zijanjeeni kurungi na za Ruhanga. Mu kubba na ngonzi zizo hūbwo tubba twegeeri kimwei

nti kwo tuli bamweji. <sup>6</sup> Yogwo yenseji akukoba, “Ndi hamweji na Ruhanga,” alina kwetwala nka Kurisito kuyeetwalengi.

### *Kiragiyo Kihyaka*

<sup>7</sup> Banywani bange, kiragiyo kikyoo kimbahandiikiiri tikili kihyaka, beitu kili kiragiyo kikadei kimwaheebewe kuruga hamwatandikiiri kwikiririza mu Kurisito. Kikyoo kiragiyo kyokyo kya bigambu bimwegwiriho.

<sup>8</sup> Beitu kandi de, kili kihyaka, hawwakubba mu kuhondera kikyoo kiragiyo, Yesu Kurisito yoolokeerye mananu gaakyo, nanywedede mukyolokeerye nka kukili kya mananu. Kili kihyaka de hawwakubba ntiti gili mu kumalikaho, kyererezi kitandikiiri kwaka.

<sup>9</sup> Yogwo yenseji akoba nti, ali mu kyererezi, beitu kandi akabba na nnobi hali beira baamwe, yogwo muntu akubba naacaali mu ntiti.

<sup>10</sup> Yogwo yenseji abba na ngonzi na mwira waamwe, akoora bintu byamwe hasyanu mu kyererezi, tihaloho kintu kyenseji kikusobora kumuha kukora kibii. <sup>11</sup> Beitu yo yogwo ali na nnobi hali mwira waamwe abba mu ntiti, kandi de abba naakulibatira mu ntiti; abba ategiri cali akugyenda, hawwakubba ntiti gibba gimwijeiri meiso.

<sup>12</sup> Nywe baana bange mu kwikiriza, nkubahandi-  
ikira bibi bigambu  
hawwakubba bibi byenyu byaganyirwe  
mwibara lya Yesu Kurisito.

<sup>13</sup> Nywe bahandu mu kwikiriza, nkubibahandi-  
ikira

habwakubba mumwegiri, yogwo  
munyakubbaho kuruga mu kubanza na  
kubanza.

Nywe basigazi mu kwikiriza, nkubibahandiikira  
habwakubba musingwiri Sitaani.

Nywe baana bange, nkubibahandiikira  
habwakubba mwegiri yogwo Bbaa weetu.

<sup>14</sup> Nywe bahandu, nkubibahandiikira  
habwakubba mumwegiri, yogwo  
munyakubbaho kuruga mu kubanza na  
kubanza.

Nywe basigazi, nkubibahandiikira  
habwakubba muli ba maani,  
kandi kigambu kya Ruhanga kiicala muli  
nywe,  
kibaheeri kusingura Sitaani.

### *Muleke Kwegomba Nsi*

<sup>15</sup> Muleke kwegomba nsi rundi kintu kyensej kya mu nsi. Yogwo yensej yeegomba nsi, abba atakwendya Bbaa weetu, Ruhanga.

<sup>16</sup> Habwakubba bintu byensej bya mumu mu nsi: kubbe kwegomba kubiibi kwa ha mutima, kwegomba kubiibi kwa mubiri, na kwetembya nka ali neitungo, bibba bintu bitakuruga hali Bbaa weetu, beitu bya nsi. <sup>17</sup> Nsi na kwegomba kwagyo bikwiza kumalikaho, beitu yo yogwo akukora bya Ruhanga biyendya alyomeera biro byensej.

### *Banyanzigwa ba Kurisito*

<sup>18</sup> Baana bange, kasumi ka mmaliira gya nsi kali heehi kudwa. Nka kubaabweereeri nti munyanzigwa wa Kurisito akugyenda kwiza,

kandi na hataati banene muli bo bamaari kadei kwiza. Kikyo kyokyo kituheeri kwegu kasumi ka mmaliira nka kukali heehi. <sup>19</sup> Bo babwo bantu baarugiri muli twe, beitu mu mananu batakabbe beira beetu. Kubba, hubaakubbeeri nibali beira beetu, bakabba nibacaali natwe. Beitu kugyenda kwabu kwolokereerye kimweji nka kubaalingi batali beira beetu.

<sup>20</sup> Beitu nywe, Yesu Kurisito yaabaheeri Mwozo Musyanu, kandi nywenseji gagwo mananu mugueegiri. <sup>21</sup> Kigyendeerwa kya kubahandiikira gagwo mananu, kitakabbe nti habwakubba timugueegiri, beitu habwakubba nti mugueegiri. Kandi de mukyegiri nti hugobya tibukabbangamwona mananu. <sup>22</sup> Mugobya yooyo naani? Mugobya tiyooyo yogwo akugaana Yesu nka kwali Kurisito, Mutongoole wa Ruhanga? Yogwo yenseji yeegaana Bbaa weetu na Mwana, yogwo yooyo munyanzigwa wa Kurisito. <sup>23</sup> Yogwo yenseji yeegaana Mwana abba atali na Bbaa weetu. Habwakubba yogwo yenseji yaatula nti eikiririza mu Mwana, abba de naali na Bbaa weetu. <sup>24</sup> Nahabwakikyo mite mitima myenyu ha bibyo bintu bimwegwiri kuruga ha mwatandikiri kwikiririza mu Kurisito. Bibyo bintu bimwegwiri, hibiliicala muli nywe, hupwo nanywe de muliicala mu yogwo Mwana na mu Bbaa weetu. <sup>25</sup> Kubba kiki kyokyo Kurisito kijaaturaganisiriye: bwomi hutamalikaho.

<sup>26</sup> Nkubahandiikira bibi bintu mwa kubaweera nti haloho bantu bakwendya kubagobya. <sup>27</sup> Beitu kandi nywe, mitima myenyu nka kumilimwo Mwozo Musyanu, wa Kurisito giyaabaheeri, yo-

gwo Mwozo eicala muli nywe. Nahabwakikyo timukwetaaga muntu wondi yensei kubeegeesya, kubba yogwo Mwozo waamwe abeegeesya bintu byensei bya mananu, bitalimwo bugobya. Nahabwakikyo, kusigikira Mwozo waamwe nka kwabeegeesya, mwicalenge mu Yesu Kurisito.

<sup>28</sup> Nahabwakikyo, nywe baana bange, mwicalenge muli yo, aleke hwalibba eiziri atwageye nituli basigiku, tutali na nsoni kwemeera mu meisso gaamwe kumutangiira.

<sup>29</sup> Nka kumwegiri nti Kurisito yooyo abalwa kubba naakusimwa mu meisso ga Ruhanga, muli na kwegade nti babwo bensei bakora bintu bikusimwa mu meisso ga Ruhanga boobo bali baana ba Ruhanga.

### 3

#### *Kwicalanga nka Baana ba Ruhanga*

<sup>1</sup> Mubanze muwone Bbaa weetu nka kuyaatwendeerye hoj, twadwa na ha kwetwa baana ba Ruhanga! Tuli baana baamwe kwo. Beitu bantu ba nsi babwo bateikiririza mu Ruhanga, bamwegiri kwahi, nahabwakikyo beegiri kwahi nka kutuli baana ba Ruhanga.

<sup>2</sup> Banywani bange, hataati tuli baana ba Ruhanga; kikyo kitukwiza kubba kicaali kwegehwa. Beitu tukyegiri nti Kurisito hwalijira, tulibba nka yo, kubba tulimuwona nka kwali.

<sup>3</sup> Na babwo benseenya bali na kukwo kunihira, bakusemeera kusyanja mitima myabu nka Kurisito kweicala musyanu mutima.

<sup>4</sup> Muntu yenseenya akora kibii abba abinyiri kiragiro kya Ruhanga, habwakubba kukora kibii kwokwo kubinya kiragiro kya Ruhanga. <sup>5</sup> Beitu mukyegiri nti Kurisito yeiziri mwakutoolaho bibii byetu, kandi nti muli yo tihabbamwo kibii. <sup>6</sup> Muntu yensej abba mu Kurisito eicala kwahi naakora bibii. Beitu yogwo yensej eicala naakora bibii, takawonanga Kurisito kandi tamwegiri.

<sup>7</sup> Baana bange, muteikiriza muntu yenseenya kubahabisa. Muntu akora bintu bidoori abalwa kubba naakusimwa mu meisso ga Ruhanga, nka Kurisito kwabalwa kubba naakusimwa. <sup>8</sup> Muntu akora kibii abba wa Sitaani; habwakubba Sitaani eiceeri naakora bibii kuruga nsi nigihangwa. Nsonga ginyakuleeta Mwana wa Ruhanga mu nsi gyali gya kuzikya bintu byenseenya bya Sitaani byakora. <sup>9</sup> Tihaloho muntu yenseenya munyakubyalwa Ruhanga eicala naakora bibii, kubba buhangwa buwa Ruhanga buba mu yogwo muntu. Tasobora kwicala naakora bibii kubba Ruhanga abba amufoori mwana waamwe. <sup>10</sup> Nyahukana giicala hakati wa baana ba Ruhanga na baana ba Sitaani gyogyo gigi: Babwo bantu benseenya batakorwa bintu bidoori rundi batendya beira baabu, babba kwahi baana ba Ruhanga.

### *Mwendyenge Beira Beenyu*

<sup>11</sup> Bukwenda bumwegwiri kuruga bumweikiririize mu Kurisito bwakobengi nti: Tukuteekwa kwendyangananga. <sup>12</sup> Tutabba nka Kaini munyakufugwa Sitaani yeita



waabu. Kyani kinyakumuha kumwita? Yaamwiriti habwakubba yo Kaini yaali na bikorwa bibiibi kandi waabu naali na bikorwa birungi. <sup>13</sup> Beikiriza ba Kurisito beira bange mutahuniiranga kuwona bantu ba nsi babanobiri. <sup>14</sup> Butwendya beikiriza beira beetu, kibba nikikwolokya nti twarugiri mu kukwa tweingira mu bwomi. Muntu yenseenya atendya beikiriza beira baamwe, yogwo muntu abba naacakafugwa maani ga luku. <sup>15</sup> Yogwo anoba mwikiriza mwira waamwe, abba mwiti. Kandi mukyegiri nti mwiti atunga kwahi bwomi butamalikaho.

<sup>16</sup> Mu mulingo gugu twetegereza makuru ga ngonzi nti, Yesu Kurisito yaaheeriyo bwomi bwamwe habwetu, natwede tukusemeera kuhayo bwomi bwetu habwa beira beetu. <sup>17</sup> Kakubba muntu yense ali neitungu lya nsi, awona mwira waamwe naali na kyetaagu beitu kandi akabula kumugira mbabazi, bubwode yogwo muntu yaakakoba nti yo yendya Ruhanga? <sup>18</sup> Baana bange, tulekere hahwo kubazanga-bubazi nti twendyangana mbe, beitu twendyanganenge na mu bikorwa kandi mu mananu. <sup>19</sup> Butukukora kikyoy, tukwega nti tuli ba mananu, kandi na mitima myetu nitumiha kuteekana mu meiso ga Ruhanga. <sup>20</sup> Mitima myetu humikutucwera musangu, tukuteekwa kukyega nti Ruhanga eicala wa hakyendi hoj kukira bintu bya mitima mikutujunaana, kandi nti Ruhanga yeegiri bintu byense.

<sup>21</sup> Banywani bange, kakubba mitima myetu mibba mitakutucwera musangu, bubwotukubba

tutali na kintu kyenseenya kitukutiina mu meiso ga Ruhanga. <sup>22</sup> Kandi bintu bitukumusaba, aku-bituha, habwakubba tukwata biragiyo byamwe kandi tukora bintu byasiima. <sup>23</sup> Kandi kiki kyokyo kiragiyo kyamwe: twikiririze mwibara lya Mwana waamwe Yesu Kurisito, kandi twendyengenenge nka kuyaaragiiri. <sup>24</sup> Bahwo bahondera biragiyo bya Ruhanga beicala mu Ruhanga nayo neicala muli bo. Yogwo Mwozo wa Ruhanga giyaatuheeri, yooyo atumanyisya Ruhanga nka kwakwicala muli twe.

## 4

### *Mulengenge Myozo Kwetegereza Hamirugiri*

<sup>1</sup> Banywani bange, muteikirizanga huli muntu yenseenya akukoba nti, yo ali na Mwozo wa Ruhanga; beitu mulengenge myozo mili mu bahwo bantu, mwa kwetegereza myakabba kwo mirugiri hali Ruhanga, habwakubba mumu mu nsi halimwona baraguri banene ba hugobya. <sup>2</sup> Gugu gwogwo mulingo gwa kwetegereza bantu bali na Mwozo wa Ruhanga: Muntu yenseenya akoba nti, Yesu Kurisito yaarugiri hali Ruhanga yaabyalwa mu mubiri, yogwo abba naali na Mwozo arugiri hali Ruhanga. <sup>3</sup> Beitu yogwo yenseenya akoba nti, Yesu atakabyalwe mu mubiri, abba atali na Mwozo arugiri hali Ruhanga. Yogwo muntu abba naali munyanzigwa wa Kurisito. Gugwo mwozo gukumulwanisya guliiza mu nsi, nka mwegwiri na hataati, gudoori kadei haha.

<sup>4</sup> Beitu nywe baana bange, muli ba Ruhanga. Musingwiri baraguri ba hugobya, habwakubba Mwozo wa Ruhanga ali muli nywe ali wa maani kukira mwozo ali mu bantu ba nsi. <sup>5</sup> Bahwo baraguri ba hugobya beicala ba nsi gigi. Nahabwakikyo bintu bibabaza, babibaza mu kwetegeresa kwa bantu ba nsi, nikiha bantu ba nsi kubetegeerya. <sup>6</sup> Beitu twe, twicala ba Ruhanga. Na bahwo benseenya beegiri Ruhanga, batwetegeerya mbe. Beitu bahwo bategiri Ruhanga batwetegeerya kwahi. Kwokwo yatyo twega muntu yaabba naali na Mwozo wa mananu, rundi naali na mwozo wa hugobya.

### *Ruhanga Eicala Ngonzi*

<sup>7</sup> Banywani bange, tubbe na ngonzi hakati gyetu, kubba ngonzi ziruga hali Ruhanga. Yogwo yense ali na ngonzi abba abyalirwe Ruhanga kandi yeegiri Ruhanga. <sup>8</sup> Yogwo atali na ngonzi abba ategiri Ruhanga, kubba Ruhanga eicala ngonzi. <sup>9</sup> Ruhanga yaatwolokeerye nka kwatwendya kuraba mu kutuma Mwana waamwe omweji musa ejize mu nsi, aleke kuraba mu Mwana waamwe yogwo, tutunge bwomi butamalikaho. <sup>10</sup> Ngonzi zinkubazaho zozo zizi: Kili kwahi nti twetwe banyakwendya Ruhanga, beitu yooyo munyakutwendya, yaatuma Mwana waamwe abbe kyonzira kya bibii byetu. <sup>11</sup> Banywani bange, Ruhanga amaari kutwendya hoji yatyo, twedede tukusemeera kwendyangananga. <sup>12</sup> Tihaloho muntu yaakawonangaho Ruhanga; beitu butubba nitukwendyanganana, kikyo kyolokya nti Ruhanga

eicala muli twe kandi de nti, twendya bantu nka kuyendya tukore.

<sup>13</sup> Tukyegeeri kimwei nti twicala mu Ruhanga kandi nayo eicala muli twe kubba yaatuheeri Mwozo waamwe. <sup>14</sup> Twewoneeri, kandi tukuha bukeiso nti Bbaa weetu yaatumiri Mwana waamwe kubba Mujuni wa nsi. <sup>15</sup> Muntu yenseenya abaza hasyanu nti Yesu ali Mwana wa Ruhanga, Ruhanga abba naali muli yo, nayo naali mu Ruhanga. <sup>16</sup> Nahawakikyo, tukwega kandi tukwikiriza nti Ruhanga atwendya mbe.

Ruhanga eicala ngonzi. Muntu yenseenya eicala na ngonzi, eicala mu Ruhanga, na Ruhanga neicala muli yo. <sup>17</sup> Tukuteekwa kwendyanga bantu mu bwizulu, aleke ha kiro kya kusala misangu tubbe batatiro tutali na kitukwetina; kandi tukwiza kubba batatiro hawakubba nziicala gyetu mu nsi mumu gili gyogyo gimwei nanya Kurisito. <sup>18</sup> Ngonzi hazili, tihabbaho butini kubba ngonzi za mananu zibinga butini hwenseenya. Hawakubba butini bwiza hawa kutina kifubiro; makuru gaakyo, yogwo ali na butini abba atali na ngonzi zizulu.

<sup>19</sup> Twe twendya Ruhanga na bantu, hawakubba Ruhanga yooyo munyakubanza kutwendya. <sup>20</sup> Kakubba muntu akoba, "Nyendya Ruhanga," beitu kandi anobiri mwira waamwe, bubwo yogwo muntu akubba naali mugobya. Kubba muntu yensei atakwendya mwira gyakuwona, tasobora kwendya Ruhanga gyatakawonanga. <sup>21</sup> Kiragiro kya Kurisito kiyaragiri kyokyo kiki: Muntu yenseenya

yendya Ruhanga, akuteekwa nakwendyanga mwira.

## 5

### *Kwikiririza mu Mwana wa Ruhanga*

<sup>1</sup> Muntu yenseenya eikiriza nti Yesu ali Kurisito, Mutongoole wa Ruhanga, abba abyalirwe Ruhanga; kandi yogwo yensei yendya Ruhanga Bbaa weetu, yendya na mwana waamwe. <sup>2</sup> Kiki kyokyo twegeraho nti twendya baana ba Ruhanga: Twe kwendya Ruhanga kandi nitukuhondera biragiyo byamwe. <sup>3</sup> Habwakubba twe kwendya Ruhanga kimanyisya tukwate biragiyo byamwe. Kandi biragiyo bya Ruhanga bitwozoheera kwahi, <sup>4</sup> habwakubba yogwo yensei munyakubyalwa Ruhanga asingura nsi. Kintu kisingura nsi kiicala kwikiriza kwetu mu Yesu. <sup>5</sup> Naani yogwo asingura nsi? Tali yooyo yogwo eikiriza nti Yesu eicala Mwana wa Ruhanga?

<sup>6</sup> Yesu Kurisito yeiziri yeegehwa nka kwali Mwana wa Ruhanga kuraba mu kubatizibwa kwe mu meezi na mu kubbwoma ibbanga lye ha kukwa kwamwe. Atakeize mu meezi gasa, beitu yeiziiri mu meezi na mwibbanga. Kandi Mwozo wa Ruhanga yooyo keiso wa mananu gagwo, kubba yogwo Mwozo eicala mananu. <sup>7</sup> Halohoona bukeiso busatu: <sup>8</sup> Mwozo, meezi, neibbanga; kandi byensei bikiraniza mbe. <sup>9</sup> Twikiriza bukeiso hwa bantu, beitu bukeiso hwa Ruhanga hwo hwobwo bukiirayo kimwe; habwakubba huli bukeiso hwa Ruhanga, kandi

hukeiso hūbu yaabūheeri hali Mwana waamwe. <sup>10</sup> Nahabwakikyo bantu benseenya beikiririza mu Mwana wa Ruhanga babba na hukeiso hūbu mu mitima myabu; beitu bantu bateikiririza mu Ruhanga, bamufoori mugobya kubba tibeikiriza hukeiso hwa Ruhanga huyaaheeri hali Mwana waamwe. <sup>11</sup> Buhwo hukeiso hwohwo hūbu: Ruhanga yaatuheeri hwomi hutamalikaho kandi hwomi hūbwo huli mu Mwana waamwe. <sup>12</sup> Yogwo yensei abba na Mwana abba na hwomi hūbwo; yogwo yensei atali na Mwana wa Ruhanga tali na hwomi.

### *Bigambu bya Kumaliira*

<sup>13</sup> Nywe beikiririza mwibara lya Mwana wa Ruhanga, mbahandiikiiri bibi bigambu aleke mukyege nti muli na hwomi hutamalikaho. <sup>14</sup> Bibi bigambu byobyo bituha kubba basigiku nitukugyenda hali Ruhanga: nti kakubba tusaba kintu kyenseenya kili mu kwendya kwamwe, akutwegwa. <sup>15</sup> Kandi hutwakabba tukyegiri nti atwegwa mbe mu kintu kyenseenya kitumusaba, tukukyega nti tukwiza kutunga bintu bitumusabiri.

<sup>16</sup> Kakubba muntu yenseenya awona mwira waamwe naakukora kibii kitaleetera muntu kukwa, yogwo muwona mwira akuteekwa kumusabiranga aleke Ruhanga amuhe hwomi. Kiki kikukwatagana na babwo bakora kibii kitaleetera muntu kukwa. Halohoona kibii kileetera muntu kukwa; nkukoba kwahi nti kiki kyokyo muntu akusemeera kusaba Ruhanga akimujune. <sup>17</sup> Kukora kintu kyensei

kitadoori kibba kibii, beitu haloho kibii kitaleetera muntu kukwa.

<sup>18</sup> Tukye<sup>g</sup>iri nti muntu yenseenya abyal<sup>i</sup>irwe Ruhanga eicala kwahi mu kukora bibii; beitu Kurisito munyakubyalwa Ruhanga amulinda mbe, kandi mubiibi yogwo tasobora kumukola kubiibi. <sup>19</sup> Tukye<sup>g</sup>iri nti tuli baana ba Ruhanga, kandi de nti nsi gyenseenya gikufugwa yogwo Mubiibi. <sup>20</sup> Kandi de tukye<sup>g</sup>iri nti Mwana wa Ruhanga yejizi yaatuha kwetegerereza aleke twege Ruhanga wa mananu; kandi twe twicala mu yogwo Ruhanga wa mananu habwakubba tuli mu Mwana waamwe Yesu Kurisito. Yogwo Yesu Kurisito ali Ruhanga wa mananu kandi yooyo atusoboresya kutunga bwomi butamalikaho.

<sup>21</sup> Nywe baana bange banyendya, mwehale kuramya bisisani.

**Ndagaanu Gihyaka**  
**Gungu: Ndagaanu Gihyaka New Testament**

copyright © 2017 Wycliffe Bible Translators, Inc.

Language: Gungu

Contributor: Wycliffe Bible Translators, Inc.

All rights reserved.

2020-11-17

---

PDF generated using Haiola and XeLaTeX on 22 Feb 2024 from source  
files dated 29 Jan 2022

b2d1b010-ce36-53f8-94bb-ea31f34239cc